


Edjean Semeleer a ricibi un reconocemento pa su aporte na Cultura di Aruba



ORANJESTAD (AAN): Durante e conocido show 'Hey ta Pasco' di Edjean Semeleer na Ser'i Noka, Minister di Cultura señora Xiomara Maduro a sorprender Edjean cu un reconocemento pa su gran aporte na Cultura di nos Pais.

Edjean tin un trayectoria artistico di 25 aña largo. Ya for di e edad di 3 aña Edjean a cuminsa duna mini concierto pa famia, a participa den Voz-I-Landia, a graba disco compacto y ta organiza concierto pa fin di aña.

Edjean a sa di gana un gran cantidad di premio y a ricibi varios reconocemento entre nan 'Premio Mo Tito y Rufo Wever,' 'Den Ambiente Awards,' 'Premio Cultural/Persona di Aña,' varios biaha ganador di 'Un Canto di Himno y Bandera,' y Edjean tabata varios biaha Rey di Dande.

E reconocemento di Edjean a haya un bunita contenido na momento cu Edjean a invita Minister Maduro pa canta hunto e clasico 'Cunucu di Seit.' Tabata un momento sigur historico na unda cu e mandatario na un forma spontaneo a transmiti e aprecio y sosten cu nos Pueblo tin pa Edjean como un artista Arubiano cu ta laga Pueblo biba nos cultura.

Minister Maduro di Cultura den nomber di Gobierno di Aruba ta felicita Edjean pa su 25 aniversario artistico ta gradici'e pa su aporte na e herencia cultural di nos Pais.